

四庫全書

集部

欽定四庫全書

雲村集卷四

明 許相卿 撰

書簡

內有字號爵謚未的不敢妄書

上王陽明先生

六首

某罪戾餘生遠違矩正情禮負教慚懼何言伏惟道化
德猷坐殿南服炎荒絕徼久外天日之夷一旦手挈之
聖治輿圖中竊覩平復田州一疏遠猷深識夫豈近世
功名之士所敢覲其藩牆某跼伏堽堵亦為吾道增氣

舊聞清恙時切馳戀伏惟倍萬崇攝以致康豫無任切禱

遠道範忽已易歲昔者及門為役之日枯瘠方有生
意已而霜霰斤斧戕賊相尋矣某旅進竊祿以疾請告
得歸計在秋冬之交洗心趨侍夫子矜而沃之餘潤以
淑此生拜賜之辱所謂生死而肉骨也力疾修狀惶恐
惶恐

某承乏諫省深懼弗任伏蒙不遺賜之嘉貺督以誨言

欣戴祗服圖惟策厲以無忝門下不意先太宰奄爾薨
逝伏惟純孝至哀何以堪處竊冀強饘從制以任斯道
以幸末學以慰天下切禱某使事方羈弗得奔慰曷任
憂戀謹具香帛馳上伏惟鑒納不宣

溽暑伏惟台候百福頃奉勤誨粗心懣識未敢謂有見
處已如暗室漸覩隙光由茲以往或得與觀天日之大
拜賜之侈殆於罔極矣伏惟為道崇護鼎茵以迓天休
某聞教以來日嚴顧謫病耗疎劣自策弗前寤寐依依

函丈之下也執事方今為國長城坐殿南服時平志遂
然後歸西州表東海某得後諸生霑餘潤以與聞斯道
日夕以冀也昧于崇嚴悚仄無已

某稔惡死不塞禍家君奄棄諸孤摧割萬狀偷爾苟活
伏承尊慈遠頒賻慰曷任感泣仄聞仗鉞南紀茂建殊
勲斯道妙用格天震世甚盛某罪殃餘息祇恐溘先朝
露弗及快覩凱還謹遣兒子某代申謝私遙瞻旄纛曷
勝隕絕荒迷失次

上邵二泉先生

閣奉教範積有歲年睠懷造就之私未嘗一日忘拜賜也伏惟執事年德彌劬聲實並隆無任為斯文忭慰某志業疎迂抱病山谷矍然故諸生也時從長老憩棠陰頌餘愛耳敬修啟居千萬為道崇攝不宣備

上湛甘泉先生

某惡稔禍鍾家嚴無祿日月不居奄將就土酷罰殘息無望更生惟是遺行一二恐遂泯焉無傳不肖孤死且

不瞑伏惟執事大人辭嚴袞鉞海內迷于檄外事關迷
作僉屬信傳不肖孤舊執羈縻之役恃此輒敢忍死狀
述先行一二以陳于下執事伏惟夫子矜而賜之一言
以信其小善庇其遺孤海眇山崇曷足仰喻恩貺阻遠
不得違次跼請謹托吾友蔡希淵候領襄事日迫伏由
以須荒迷無任哀祈之至

上祝虛齋先生

二首

某勝衣知學逮今抱子猶夫人也頃讀揚子雲書務學

不如務求師始自憬然伏惟執事茂實望隆抗顏作模
遠近之士從事斯文者屬武取衷焉矧夫末學近產里
閭辱在肺腑於攀援為便敢以文質乖陋不足仰承為
解謹錄其所撰詩賦若干首序記若干首以先大道未
聞徒飾末技自知不足藉手以見執事姑即此而觀焉
占其他日可與於斯文與否而進退之幸甚

俾還備諗尊體康豫并拜簡書之賜辭旨勤篤若欲進
某於道而俾弗終為鄉人感激感激嘗聞前輩以知人

為難後進之士雖沈淪幽側之中以身許人固亦未易是故士之稱相知者或相望於千里或相追于異代某幸在末姻晚學伏辱降屈年德獎引過情使某自信加厲以克有立受知己之庇固已侈矣豈必執經請業綴牆屏之遊而後拜嘉貺哉又念世俗人一遭人之惠顧不以至公相期而趨走門下以卑昵自親非惟自薄抑恐待知己以不厚是故某惟思少勵志節報國士之知而已關中古王者之所都風氣靈異士之冀北先生銘範

之下諒彬彬矣山林草澤夫豈無奇偉自重抱道相時之士出於門下耶亦嘗一曲垂意以禮某者禮之否乎
遠遠左右不聞至論便風時賜教督以終大惠蓋啖一
嚙而思快意於五鼎之間也

與鄒謙之太史

都城獲瞻道範寤寐時切向往歸值愍凶屏居荒阻罕
值京洛之便無由一致渴懷日冀大行以昌斯文而猶
爾差池時固有待耶遠寄志刺申諭良知殊極明切端

拜相成之惠敢不奉以周旋但恨夙生葷血亟難澡滌
耳疲繭不任趨侍第切悵往驕暑千萬為道良食厚自
愛

與劉梅圃中丞

某學晚多病孱劣無所堪可於時是以方進亟退為終
焉計巖栖十許歲遠近親知己忽忘如隔世執事乃以
不祥姓名玷薦牘中莫知何以致此伏惟執事間氣名
世之望齒牙餘論當時異代據以重輕猥及孱劣曷克

仰副第知量能度分卒歲山澤為信道知恥之士苟免
貽辱知己以為報爾雄章頒示手之三覆不能舍什襲
藏去為子孫榮西望旄戟伏枕不任向往瞻企之至

與汪惟賢太守

往歲薄遊南都獲瞻教範方毅敦碩諸先達中私衷尤
切鄉往自維疎慙厚籍護持感激曷敢忘不敢言謝恐
自外於長者云耳伏惟執事厚積重望方當致力中原
而遠守百粵然使文治興於徼外稱自執事始則又廟

堂簡任之意也風便勒狀布區區惟為民倍百加愛

與許廷美方伯

枉使臨存教慰良厚具審春和台候百福某昔備斯文
下走獲承德範日勤向往多病跼伏弗能一望履約為
恨反聞吾友伯修不祿悼痛累日下諭顛末復聞經紀
其家高義凜凜某徒切愧歎而已未間伏冀為國加護
以佇詔徵

與東橋顧華玉參政

春和伏惟台候百福某憂病跼伏荏苒歲年過辱貶教
移文督之就列敢不敬承不幸烈禍積疴之後羸僊不
任冠裳厚負上恩祇辱嘉命曷任惶懼伏勤移報俾得
待盡桑梓獲免顛踣修塗無任感荷

與莊渠魏子才學政

某今之鄙人也心實向善而氣質昏弱因循歲年已幾
墮廢比夏納謁執事深造厚積雖未能測其涯而容止
辭氣種種皆教向往益切疲路稍稍自奮秋領墨教倦

惓欲引某於聖賢之歸先生固與人為善之公某不能
不私以為惠耳始思日前向善而今猶夫人蓋皆意氣
自矜以徇外為人初未嘗著實向上迺今不覺爽然自
失且悔且幸知有不吝但已顧不美之質荒惰之志望
聖賢科級猶天然不免猶有畏難退屈之念時梗於中
奈何伏祈不憚終教某赴限至京口疾作不果行今奏
請以待儻獲養痾山中更乞詳教將服膺以周旋也冬
寒伏惟為道厚自愛

與南溪吳德翼方伯

溽暑伏惟台候百福某病息奄奄僅屬長晝閉關編摩
往迹似略有緒億力不能就正有道為恨粗具稿草企
俟裁教未間千萬珍攝以慰邦人大老之瞻切禱

與苾齋查原博參政

某非登高能賦之才公不知其不肖督以簡槩之役抒
思成辭苟以逭咎伏惟是正登卷

與朱應周參政

越山對雨舊愛藹如歸病闕然久不報雅誨英風夢想
猶恍恍也共惟賢勞場屋為時得賢某跼伏林廬但深
慶躍顙狀敬致勞苦之私伏冀尊生養福以究大業不
宣

與鄭伯興考功

闊違德範無任瞻企恭惟賢者當路海內之士爭自濯
磨思出門下某夙承知譽進備采擇尤切大願奈何數
奇疾劇醫藥罔功進退狼狽謹令人抱奏惟執事加憐

曲庇之使歸料理曷勝感刻知己之惠

與孫山人太初

道況清勝良慰僕屬望執事詩云乎哉伏惟著已自愛
一力聖賢之學使吾道不孤甚盛願問行李更有浹日
之留當接膝竟日以究高論

與衡山文徵仲內翰

僕奔驚全埃江南山水日夕神往况公山水中人耶妙
染乞時寄惠某將神遊其間如陪公巾屨也

與崔同仁少參

某昔遊諸生間謬辱獎譽過絕等倫感刻知己曷其能忘頃獲通籍羈於班行無由造敘此懷為歎仄聞遠仕老歸清約如昨某愛莫能助願先生益終此道為光令孫去謹勒手狀布區區

與徐子謙太守

頃歲道上國辱禮際重以譽愛甚篤矢藏中心不辱道義以為報耳循良政成波及鄰壤某時得泳游匪直播

揚而已

與況廷光大尹

遙聞楚氛甚惡事儻或然四百里元元之命君侯一人
是寄方今所以慎固封守練足兵食薄征緩刑綏善禁
姦義結人心靜鎮浮議以防狗鼠乘時之奸憂民者諒
有成畫矣賓興有事當路者欲於執事委重焉緩急殊
勢識時務者似不得舍此就彼也杞人之狂惟執事察
而圖之

與郭于周大尹

彌冬雨雪殺氣過嚴菽麥野萎父母斯民者諒隱於衷
久矣春來物態生意一新惟仁人寬卹涵煦以順陽和
以消陰沴當必有出於時政文法之外某抱病山中方
日望之

與張元傑給舍

闊遠德範洊歷歲年夏中乞告人往扶僊遣狀徹從
史否旋聞公爭大議去國某雖跼伏草野不能不為時

扼腕豈特歎息私公耶高情雅度自知盡分而憂國者
日冀天定以還偉人風便謹勒手狀候安否

與鍾西臯彥材太守

三首

某積病待盡分久自安名流達黨不物棄而惠存之已
忝博愛執事大章腆貺作意寵嘉則何能堪三復慙佩
而已殘息喘暑裁報潦略伏惟容察不宣

閣奉音塵悵望勞結忽辱雅製綢繆徃復甚厚况復過
示謙光輟惠珍刻感激安可津涯巖廊風望時當急賢

尚爾養晦竊為海內遲之未驛召間千萬為時厚自愛
日枉臨存重拜加惠感誦曷之能忘諸孤躡進曷敢弗
揆幼學驅之競時速化古稱日暮途遠老獨不幸似之
冒爾匆匆非本懷也誠不自意獲武賢震器餘塵復藉
大老為之司盟豎子因宗有弘休矣教墨云云敢不奉
以周旋候請諸凡未及伏乞一一指揮

與徐東濱子正

三首

比聞南轅病體未能往唁春會王子揚知兄於用舍之

際已自洒然僕更何言伏惟老先生太夫人眉壽高堂
古人所謂不以三公換一日之養之時兄及時承歡養
志真樂無涯僕蓋不以言而以賀也薄物奉見區區千
萬撫入

教言妙語并辱盥而展誦嚙以秋泉波潤稿瘠矣共審
侍奉多福吟社高情樂事甚雅某懶拙日課耕奴暇則
松根團蒲栩栩飽睡耳兄能過山中譜混沌乎

某病伏閣候時稔玉體健勝於邑人來者以為慰過辱

書問殤孫感刻感刻僕痿卧靜閒竊窺造物大意則玩弄為娛或者惡其不恭摧奪豎子以警之耶是可若何夫亦順受之而已耳

與錢海石懋垣司諫

四首

僕削迹周行晦影深谷二十許年海內志義摩切之交邈如異域端居丈室博擇先民反求初志以自厲然時不免伊誰與語之歎夙欽英望思為執鞭多病錮而持之過辱執事不以沈廢慙迂為非偶取之於聲氣聯之

以婚姻比廼儼然臨之儀物盈庭誨論彌日反身之學
體國之衷俾得一二與聞不覺神酣心醉若客遊萬里
歲宴始歸而親暱舊故相與抵掌談所涉歷慰其辛苦
也誠不自意積久離羣復此大快耳惟茲春序向和使
輶臨發乘間呼舟金牛玉帶間某當扶曳支離以武餘
塵為信信之遊幸甚

伏奉高論星變仰觀博古之學憂時之誠傾歎無已僕
常聞之師中土文明火地每值歲之丙午則火盛極而

變往往多事皇初載籍未備傳聞多訛無庸解說越稽
春秋以來凡當是歲鮮不禍應惟漢武帝世祖唐文皇
宋真宗四朝獲免而武帝征伐禱祠幾續亡秦世祖承
王莽更始之亂因天悔禍之初文皇亦以末年征遼大
役武氏僭亂亡將及矣真宗差為太平而契丹敗盟天
書誕妄東封西祀虛耗海內未為全盛也入我天朝初
丙午為元亡再丙午為宣皇之元三丙午丁未為憲朝
之末今值厄運而聖德消弭卒無其應天下蒼生之福

也然此日雷電虹霓非時大變頗駭羣心說者疑以海
舶應之夫海賈擾攘自是付託非人變通無術張皇迫
逐致然所謂庸人擾之者也愚策特費一提舉司官吏
監督互市自可一疏而辦所謂化盜賊使為良民妄見
殊不以為是為意也承諭及出處僕未能測知執事意之
所存特念天子方譴柄臣厲精更始以執事強力壯毅
望實去國中外疇能舍旃但世變江湖仕途如棘若既
出旋歸則致身之義其將謂何故願高志先定徐觀時

宜斯出處無悔矣夫孔明無所遇合終為南陽布衣耳
歷觀往哲高志雄才甘於埋光草澤不屑輕試其身誠
以時之難也僕衰鈍退怯僵卧空谷幾四十年故欲獻
其愚嫌徇已見訥訥不能出口特以葭莩之倚終不能
忍冒昧一言之伏惟不以卑論撫外

共諗使節遠自日邊指湖南以盡海徼萬里宣上威德
甚盛某病廢空谷中無由快瞻為歉比辱貶賜誨函責
之委躬陳力此某之分也敢弗奉以周旋特艱虞速老

精已銷亡苟懷一丘偷延病息聊以卒歲耳親教曷從
祇切神往

僕聞之婚姻各惟其類太上以德義其次以門閥其次
以才以年至流俗榮利焉末矣僕疎寒固迂混迹樵牧
晚舉兒子聞造狀岸甚野過不自量敬因媒氏通誠門
下僭乞姻盟伏承執事不遺弗類惠許愛子壻兒聞造
自茲得御賢達或免終溷俗流執事榮施於寒宗世世
有弘休矣不腆先給舍之遺薦幣納采因以問名眇焉

無足藉手伏惟執事古風高致或不屑意於時之珍飾
麗觀而以志義之末許僕萬分一亦可以承下風則澗
毛行潦明信可陳矣恃此無恐少儀副封并賜撫納

與一所金汝白督學

四首

別久日深悵望比想身心工夫漸益精密顧時俗所習
人情所安能漸摩委曲以合於理而不索露其輒絕可
駭之迹似更盡善况夫處人與律已異恐宜更寬一步
勿厚望於流俗人以為何如

嘉禾執別來歲又幾半音耗闊然季秋得子揚書云汝
白一疾幾不療驚怛懷注彌切冬初書報勿藥喜慰無
量不啻尋常音耗而已汝白素弱積痾之後精氣未便
完復尤宜擇醫藥慎服食禁勞慾倍萬調護切禱某二
親粗安婦子無恙但一身困冗行怠學廢負吾故人甚
切愧懼所自恃者正汝白所謂空志耳養心讀經之言
甚善矯飾為人之戒切中某膏肓敢不力自克治曾子
曰士不可以不弘毅毅則汝白能之或於弘上更當加意

為學應務皆然汝白試思之以為何如便風幸不倦書
劄數友中某最孤遠賢兄弟願常在念不宣

春和教暇多福僕比歲憂病再承賻慰遠道勤念益信
布衣道義省已淑人舊學諒益醇篤來諭此官甚勞然
不得辭所貴正範端習俾時收實用為不徒也僕病日
深錮分守丘壠所冀麗澤餘波霑丐枯瘠幸甚

僕久屏幽谷平生誼舊音耗無由一通三月中容菴書
報尊封君并太夫人繼違榮養驚惶愧咎無已緬惟孝

誠純切日月踰邁摧割未夷宜匍匐哭慰奈病體憊伏
積久童孫未知拜起田僕鮮充使令東望悲悵徒切一
所端居久養身心工夫諒益深到令郎必大成立然無
可是足時也某情陋無進但硜硜不敢隨流自辱然視
昔所期則已厚負明師良友風便馳疏想及祥禪同親
之愛自等越人罪愧無所容追千萬節哀從制以崇大
孝

與容菴應邦升尚書

四首

春莫徐北舟楫差池雖便風兼程歸心稍快每念邦升
獨處無聊輒復耿耿且欲聞直言如對燭敘別時何可
得也某二親初適婦子無恙第多遭外喪役事致訟驅
馳無旬日寧孤陋值此荒廢可知獨惟空志猶崛然耳
吾邦升以剛明之資操邁往之志願再加堅忍鎮密之
功何遠不可到教某不徒從事儀文節目而一力於讀
書真對病良藥愚意則謂讀書窮理固養心一項工夫
然居敬靜虛以為窮理之本似尤源頭當著力處否雖

四書六籍聖賢大訓不免徒耗其神於章句文字間耳
邦升以為何如塊處窮鄉同志星散南顧淒然況我邦
升誠直懇惻初終表裏一揆交游數兄弟中某尤所倚
仗便中萬萬不惜手札以督蹇鈍

憂病沈淪如與世隔故人連袂徒步弔其不幸於窮谷
中燠休通昔槁死形神旋有蘇意曠情殊義感泣無已
竊覩比來德業日新去某不啻倍徙但好勝時動客氣
取善或念舊惡似猶有舊根在力消融之則某之師也

某衰病奄及祥禪累然未任衣冠榮名未盡忘懷精力
殆弗可強亦任運委時已耳吾友邵思抑便布起居思
抑力學與善僕資之甚厚邦升與處當有弘益風便萬
萬以所得惠教至望不次

去秋聞邦升轉轄江右計與汝白日夕道義切劘為賀
僕且以不與需餘潤為恨也周懋登冬還承惠手尺惻
惻閔念毀瘠僕却以病不以喪乃今稍克支吾但終不
耐煩勞耳來諭似有歸興恐未宜然邦升才志值茲明

盛中道卷懷平生小小違拂何太不廣耶古稱做官溺
人志要須超然無累為期不以必退為高也僕顛拙沈
痼精力萬不可強所敢以退自安者有如日西望顒顒
千萬善餐遽學自愛

歲晚知舊永別中離時切感悼又或爽節初終不免惋
恨惟三二岷然金石交又復星散更何能為情僕空谷
深蹤杳聞達途之耗秋中得一所書知容菴藩翰滇南
睽越萬里神魂飛不易到倍增寤歎耳僕浹歲血疾一

再瀕死幸爾得甦山村少事病鄉無擾閒靜養心老獨
次寥頗自知命而安之休休自得絕省外慕他無長進
可答雅望也

與鶴山王子揚 二十首

行時嘗一簡道別來此偶承諫察之乏昔所欲言與鄙
夫人之不言者今皆茫然未得要領能言不難言而有
益不易兄將何以助我歛人潘薦叔好古而達於辭今
之雋選也去為樂清兄雁蕩勝遊得東道主矣執手之

歡歲年為期奈何

上東門執別已三閱月病懷時事恒在憂虞中真以日
為歲頃得賜歸始有見吾親并吾故人之望病軀緣是
差強而時慮更切實不敢以歸為幸迺今傳聞日駭事
勢日危旦夕念此如昔之思南奈何奈何徐曰仁竟作
泉下人傷哉傷哉邦升疏請南曹蔡兄力乞校官想俱
可得汝白卓然有立吾黨增氣守中兄地居上游可虞
今亦已還兄去國時謗騰涌同里或猶見疑恐疾惡已

甚有以致此責已遠怨為善大抵居鄉恂恂似不能言
遜言無道之邦似是吾徒居今之律令而許子將王彥
方是或一道要末可盡學耳

室中之變遽枉使問勞苦備至感悼彌切老大恥為兒
女態但竊自憫不弔于天再世罹此巨創感念舊痛心
焉如割耳

危病浹歲而蘇幸復得請如再有此身身外事一不關
念惟生平知己猶尚耿耿留懷間為吉水力希古人

人之政惟務實無倦克終嘉績為慰

闊別疎問此心無日不三四至兄所也弟家蠱紛如疎
懶加因獨歎丈夫經濟豈當習之米鹽薪水之課耶行
且棄之客遊江東矣兄何時可來當除館以待候人

教尺三至別緘尚多浮沈兄夙夜在公勢何暇及廼爾
勤辱彌見平生矣某自嬰禍難血氣日衰神宇不復僵
痿巖棲分為清朝棄物寧復更有遠志以從教援兄交
誼多情請姑抑制當自弟始以信於海內士大夫曰相

知相成斯誠善矣弟亦與蔡馬山廬粗就料理過兒折肱再完但癡肥不了事都不以挂懷抱矣悵望北雲無任淒斷

一別改歲冗累增劇真從傀儡場中度世爾時見聽光大師怪語供笑劇如荆卿狗屠暫相怡悅耳

山中忽遇溫人授書疾讀得平安字甚慰三復之餘旋疑前此惠教魚雁似尚浮沈抑使事有程不暇作長語耶何經年一紙漫爾涼燠數言外不一語相策勵也缺

望缺望

向熱釣候多福祝思允書回致兄欲相推挽之意慊猶
未已某於兄更何間然纔有此懷便從兄開口因之報
答上恩亦結髮讀書初志也但夙夜彌痼野性已成不
復可任驅策去冬手築繭窩於妙果山令兒輩死便埋
我兄無祇勤吏人矣叔夜之僻僕頗同之但不忍巨源
兄耳因風聊復奉報

知已中年曠隔燕越常自惻惻於懷不但作惡而已妙

語遠來三復恍見高懷懇爾獨至蘭絨精縟曷稱衣被
某年逝力屈平生嗜好不却自遠知己尚欲鍾鼓爰居
邪茲冬山中殊少雨雪芒屨短策時與村農谷樵倒一
尊於夕陽籬落間布褐甚溫菜菹甚甘野語甚洽兄輶
車乘便一過星涯農談半日恐亦不惡酣餘風便草草
不盡

經歲一書夢想徒渴弟山居如在井底猶聞吾兄多謗
芒刺切膚溫俗不淳乃爾豈兄疾惡過峻太不自恤以

輕犯世患耶北行擬孟冬之晦便風能時惠教督否
承訪北行事宜隨幾順應不敢逆度但弗宜以迹自異
而為衆議的耳太史公曰道固委蛇請更商略之繭製
并往遡風長路中若時相溫存也

遠慰多難別去倍隕絕襄事以來神奪形廢皇皇日不
忘死與兄習嘗夷險由壯及衰寧信覆載間有此艱危
天日下有此光景獨金石故人時復耿耿於衷若死生
以之者耳出處去就僭嘗奉商高賢明義但步移影變

曷能遙度昔人所謂冷煖自知耳今日睿聖厲精賢雋
奮庸舉措興革咸暢鬱望兄展其平生懋樹溫國勲猷
不孝苟活踰伏巖棲竊獲自附景仁有餘榮矣徐生去
倉卒無次

夢想風神日增勞結空山僵卧罕逢佳便可附只尺耳
某舊恙日劇量能度分必不可再出壞其平生為知己
羞但惟此中紆鬱幽懷形影知己無繇致之左右一相
印賞故才欣然處便覺耿耿耳江湖日遠晤語未涯千

萬為國厚自愛

沈提舉回承寄哭先君二詩一展軸間聲與淚俱不忍
終業兄掄材致理德澤良易遠及要須冒次蕩如太虛
不以一毫愛憎先入為禱弟病益沈痼攝衣應客輒憊
伏移時想非久交還造化舊物耳山廬粗衛風雨兄大
拜歸寧道此有對牀處矣

仙舟丙夜飲聞博雅之談渴懷沃以甘露矣繼欲請益
山鄉絕少良便寤想勞結奈何奈何伏承教督陳義甚

高三復卒業不覺感涕朋友道喪久矣斯義古人無幾
今人未嘗有者僕何幸蒙之抑何德以堪之感激感激
僕顛昧疎迂不適時用尚論往哲已愧舊官今更何說
是故不復敢以出處之宜請決知已過煩明教適契僕
心兄愛僕者真不殊僕之自愛矣況今時賢滿朝新進
連茹僕養疴巖谷彈琴讀書詠歌先王之遺風於風泉
雲石間萬分一得附古者求志有恥之士以不終辱兄
教所得不已多耶兄方抗顏師道尚祈力抑澆競不眩

浮華德行一科教本所繫必詢合學諸生所推服者體
貌其人而風厲於衆亦自足以興讓德師師之化矣貴
恙喘歎已安佳未遠涉江山良苦秋老氣勁慎護風寒
懇禱不宣

幽谷深蹤迴絕周道大旆去淞不得掉尾驛舟一話心
曲至今南望悵然為恨爾後聞兄名位日益崇勲猷日
益震耀光韓公之烈以紆中外南顧之憂經濟雄略於
茲一展甚盛竊惟夷獠固人類耳乞不以深入多殺為

功至誠孚格開諭招徠祇勤單車可無血刃不識近事
能如昔人否但今南鄙之患手足風痺也腹心之恙厥
有攸屬兄旦夕入柄樞筦必先厚培元氣方當致力中
原奠鼎盤石懋建大勲以齊古社稷之臣惟日望之僕
遠屏巖栖抱膝詠志實奉至教以周旋相成之惠銘藏
肝腑矣昔諭老成靜退浮競典刑僕何敢云云也但庶
幾乎往哲優哉游哉聊以卒歲云爾

與張蒙溪尚書

某抱病跼伏積有歲年自分見遺達黨久矣伏承執事
作意沈淪命舟載雨百里外入幽谷中高格勝度感歎
何極繼承妙翰大章品題丘壑三復卒業藏去為榮甚
盛第詠歎溢美內愧弗堪又將辱盛舉貽明哲累為時
公卿下士之懲則甚懼耳

與文溪鄧士魯


三首

某曩自執別蓬山病縛丈室間幾二十年分與人世隔
絕遠矣獨兄愛時時膠於胃懷殆氣味之殷曷可喻之

尋常交游間耶錫山嘗兩致問意皆書郵浮沈旋聞兄
歷坎坷永歎莫之能助某積疾殷憂諸拂意事大略與
兄等耳頃聞賢郎高舉羣季接武駸駸兄且食天定之
報矣某長子早夭孤嫠如弱草不可風兄諒為撫掌一
慨祝甥世祿來南雍便力疾布襪積之懷

舍弟過家知兄得還無錫久鬱之私一旦洗然伏惟清
忠上厯殊眷出播直聲起為舉首兄所蒙被亦榮矣超
陟方爾狎至千萬益厲遠猷以酬大造無任私禱

入夏徂秋小介三行三尼艱虞多故若與世左非忍自
外於篤愛也僕舊疾餌未膏良愈但積憂早衰齒髮已
失故我恐不復能備清時任使耳晤語未涯北望不勝
悵往



雲村集卷四

欽定四庫全書

集部

雲村集卷五

六

詳校官中書_臣葉元符

中書_臣劉源溥覆勘

覆校官主事_臣李駿

校對官中書_臣李奎

謄錄監生_臣曹希焜

欽定四庫全書

雲村集卷五

明 許相卿 撰

書簡

與端峰邵思抑

九首

郡城草遇驩洽昆弟語深及出處事宜類以僕為有知者自惟空疎何以當此豈足下謙德之恒固爾耶抑真有取於僕也伏惟足下盛年童望名位未涯而明哲幾先收身青紫紛華中使廟堂知區區之不足驕士為吾

道增氣甚盛僕安所容喙念勤問不可虛辱乃輒左獻
其愚嘗聞告君之言要在委曲詳明達下意悟上心而
不以簡嚴為工宗賢之議嫌涉矯亢來諭當甚僕意則
謂足下業已引罪而祇以病乞致仕若豫自規便取必
於上亦似未安或云伏乞明正罪罰放臣歸田為民以
為惕威昧義者之戒若憫其孤寒迫脅得從末減與以
相應降調職銜致仕以冒餘榮以理病軀陛下踰常謬
恩非臣所敢望也如此庶足下謙畏自居而吾君得處

其厚似兩得耳萬一不然執事雅尚不妨自遂而天下公是固在於令德奚損乎野夫商略宦情如山谷中人浪傳都邑事漫無足憑惟高明采譽之

僕有友沈槩嘉善人也自童丱時夙以文章名節自厲逮今凡七困場屋其卓然自信者屹不為動也為文祖先秦兩漢翩翩有逸氣辭賦詩歌亦往往典雅可誦事親孝與人信輕財好義有國士之風故憲長半江趙公大參莆田陳公今方伯陳公五清劉公督學時並加甄

賞而劉公知之譽之尤深計兄亦嘗聞之矣日者學政
隸人賄敗欲汙名士以自解而槩與焉謂嘗納賂以求
援例此蓋當時劉公惜槩久滯之厚意而非槩夙負自
處之本心也槩曾面辭人多聞且見之劉公既遷槩又
呈縣繳文以辭司府縣有吏司之蹤跡明甚顧恐崑岡
烈焰玉石不能自別耳僕病耗巖栖少且賤未嘗望見
諸公之旒節哀憤不能自達而兄畫繡道杭周旋諸公
間為深況兄之知僕猶僕之知槩得槩之平生於僕可

以知其不誣矣伏惟諸公與兄志存當世哀窮悼屈體
士惜才固其分也抑其責也願借一言轉布之諸公面
試之又加察焉不如僕言甘伏欺罔或因是而槩獲伸
於知己出之塗泥收其尺寸槩之幸也諸公之功也僕
出位之言之罪不敢辭也惟兄垂察焉

入郡會諸同志聞兄所造益遽而真廼知身心樹立者
作用自別更望精察力行以希往哲其盛僕困於家蠱
去住不能自主逐逐行隊知己者將何以進之亟欲造叙闊

懷而事故相左美之諒能述拳拳之忱也

枉教誠篤別去悵如有失疎劣所恃二三良友惟兄差
近時得求助承諭洗除舊習玩味義理須從身心着實
體究真某對病良藥感刻感刻約訪子才盛意欲策蹇
劣同入君子之域至願至願但上下左右士論躋祀先
高祖於鄉賢過此敬從後乘郭令政益明審僕何能少
助似剛敏上稍宜加意兄再契勘試為言之

去歲奉教周旋遂克苟完病軀端居深念古所謂異姓

骨肉吾兄愛僕者似之感刻感刻寓武丘時子才來會
數日夕受益良多大約謂疎謬者須痛加持志之功以
勝氣習或有所得必作用體驗斯益自信有進步處耳
荒懶尚多愧於其言歲月忽不待人奈何惟兄幸終相
之

夏中因風寓書徹從史不閣下今日所莅士之冀北倡
明斯道以興起同志舊學恐不為小試矣是以僕於知
已有厚望焉僕日遠教督退鈍弗前千萬不惜時惠策

厲使承下風

日枉使教遠慰摧殘無任感泣惟兄旬宣之澤與江漢
永甚盛舍弟檣少孤而愿先君命某句讀督之頃獲旅
進試吏武昌備屬吏下陳學晚而政未達某不幸其得
位幸其得師也惟兄視之猶弟惠教俾免顛仆獲成先
君字孤之志某旦夕且死有以復於地下矣臨紙哀隕

大拜過家惡服不得走敘闊私甚恨兄屏翰南服責委
甚隆柄用非久繼至願益宏遠猷以副久要之雅某殷

憂積疾形神銷亡志業頽廢將負襟期安得執手永歎
為別

書使召見憊伏不任趨走只尺相望彌深悵往某自罹
百憂病侵老迫坐負清時徒竊寤歎兄知愛弗忍遐棄
何以昇之使自力於夕死可矣之訓尚免沒世不稱以
為兄羞江湖日遠晤語未涯時因風翮遺之好音

與泉亭吳維新少參

三首

再貶墨諭病不時報少間倩筆以塞下問夫史莫難於

志來諭立例簡嚴無所容議僕所為父兄致私禱者歲徵賦役覈實大書人可稽籍坐見而猾胥不敢大肆巧誣是兄筆端之口流惠無窮矣然須嚴候審覆關報為據亦不消多著語也風俗之敝僕久痛心憶自兒時見曾大父行多朴野真率今諸後進文采軒然將鄙故老為長物而敦篤決孚之意殆鮮雖大地皆然亦須慨歎數言賢傑有作或緣而力矯丕變志之助也幸毋小獎郁郁以長此風況今所謂文不過排比爛腐修飾儀觀

外矜辭貌而內無忠信如優人習禮正不堪著眼者耳
於文何有詞賦恐不必載但時挂一二精語參差隱映
其餘似不勝錄為難測若一一舉之敝邑之陋反更索
露矣何如何如兄又欲僕分勞著名其間如唐宋人修
晉唐書例僕意二史列著史官姓名殆簡衷重大分曹
置局以君命臨之今此數簡小試發硯固以迎刃恐不
必為此彌文也竊意志無定式因地為體因事為用難
主故常要在言約事該如老吏斷案鑿鑿可以信傳斯

不刊矣諸如郡邑志之不能久存無亦循襲多而猥雜可厭邪殆不啻張先生所謂言無體要而已至夫否臧去取則我嚴侯明見之審執事直筆之任僕邑人也恂恂似不能言守此律令焉耳憊甚縷縷

幽屏名跡薦論偶陳吾兄又峻督之臣子大義敢弗與疾周行而所欲懷安一丘自為名高者有如日但積疢殷憂之後吾精已銷亡矣性復疎顛乖時恐一出喪其平生重負恩私遺辱知己何以見吾黨之士是以將終

混迹樵牧俟命首邱倘愚計之或未遠失者耳志事易
草文獻有徵良為邦君邦人士謝不宣

賢郎遵晦高舉兄積慶善教胥見之通家喜躍寧直恒
情但少年高科往哲亦所慎持惟顧謬吾兄命名之義
以紹世德僕切私禱過庭諒已素講矣穉事收拾蝗餘
山傭冗劇稽賀千萬照察

與白浦朱守中

三首

雨中邂逅遂弗成賀再訊候人使車已移轍矣伏惟名

邦司理舊學展布想當沛然一郡生靈司命願無易視也弟欲僭端其愚喜諛而愛太泛自廣而事多忽尤當屏絕異色疎遠羣小使耳目蕩然無所偏寄甚善弟遠教寡與便風時惠鐫切使得勉策駑駘不貽初盟之羞無任傾佇

子揚北去附致區區徹從史否比想體力佳勝弟病鄉侍藥耳恭惟太夫人多福賢兄弟無恙兄得專意體國甚盛某孱軀俗累舊殖就荒恐負愛望奈何風使布此

千萬審時厚自愛以慰傾戀

閱歲不聞京洛之耗時聞宅中平安報為慰弟獲弛於
負擔料理病軀以與老親弱弟相周旋繫誰力耶骨肉
之愛何以逾此遙聞墜馬移疾久望杳然想非久事事
意急賢之日自不可無兄耳

與李白夫州牧

三首

別遠萬里時更十年交游聚散更十伯千人心目中常
有吾白夫也往歲書與二綾自高汝白至今春書與象

杭自進士葉應期至及秋詩啓筋笏自舍人馮立至故
人之意戀戀如此自愧何以承之恭惟再牧遠郡力追
古人為吾黨光甚慰言忠信行篤敬蠻貊之邦行矣蓋
已可徵願益自信俾政孚教洽後稱南鄙聲教進於中
州自吾兄始僕日望之平明之朝當必有知之者僕德
業不修殃咎類至九年之間再喪其偶初冬又將攜稚
子南還劍州學記非久作畀蜀省令紀嘉績送行敘
未暇追補應期近宰鄰邑誠亦易達也萬里緘書神與

俱去

京邸眷存道義之愛侔於骨肉以言為別心許久矣僕不幸途次幾死於盜家食仍困於病山妻近棄諸雛嗷嗷膝下惡抱如醒未嘗有佳思到筆硯間負約知罪伏承守劍專城師帥委寄甚重劒民即杭民也兄能以教杭者治之而居之以恒持之以斷不惕於勢不遷就於俗不顧計於升沈則古之循良將可馴致僕即有言何以易此相見未涯延望豈勝淒斷

往歲傾蓋之逢已知執事志行當屈古人與相上下西南奇秀鍾于山川迺今不敢盡信昔人之言手諭石刻之惠益見盛心尋常交際必以遠大相期某敢惟迂放自諉以負執事

與我齋蔡希淵督學

四首

某疎淺迂顛寡偶少徒執事要以同志進以務實向上之學皆向來交游中所未嘗聞幸甚幸甚顧某積累工夫甚淺撓於外汨於中者日復相尋力與之戰而進寸

退尺不能自持奈何伏惟時賜教切使恒顧謏至望
承教所處詳甚非疎謬所及弟意今日當途所以待兄
非徒私之蓋將作士氣直公論以風厲一時在兄非直
為貧亦事道也顧兄有以崇正學淑人心丕變一方以
及海內答國士之知者力行何如耳

炎暑共承道候百福弟病息如綫山中過從樵夫牧豎
時共盤桓水石間耳往嘗再寓只尺曾徹覽否恒念昔
聞誨論不聞旬月今直計歲年尚未可萬一冀豈巖谷

太阻鱗羽少便抑某罪過自疏不復可援耶兄無寧姑教督之而遽屏外之也

某病甚幸不死遠枉書問感激不遺比稍行歌山澤間蕭然攜隻影耳意將苟完形骸獲免戮辱於此世以下見先人不知未死之前當果何如耳

與桂洲夏公言宗伯二首

往歲大旆經霄貶遺雅什憂病屏居久稽報謝比聞制下遂正台司昌期闊過千載僅見某憂病相仍僵仆牀

蓐有年矣竊惟舊辱游從之雅今無干進之嫌安忍忍
然不為世道致深望耶方今元聖有作輔以英才凡有
血氣孰不企踵延頸以望至治然凋瘵未蘇守宰數易
雖屢聞申勅竟昵奉行害於致理患誠不細矣執事亦
嘗畫周審之策展弘久之猷得其人恒其官復如漢人
增秩賜金者可乎否也小人跼伏巖穴昧于遠圖慮患
目睫然覩一郡邑而天下或可槩見故冒昧陳之以効
其愚

某積痾殘息僵卧萬山中過從殆絕遠近親知己忽忘
如隔世仰惟執事顧獨不遺沈淪時加誨飭念故下賤
光於昔賢某自惟屏迹疎野十數年間竿牘之問罔克
一通於京洛薦紳知舊已闕然久不報矣謹馳記上白

與雙江聶文蔚尚書

二首

闊遠儀範多歷歲年聲氣之感通於寤寐比歲聞兄按
閩風裁守蘇惠政與俗自別往來陽明門下又得淑緒
論窺精詣異姓兄弟之許若無待於接膝抵掌歷寫肝

臆為快也僕早志此學晚猶夫人幸獲從兄下風謬塵
省闈妄意建白萬分一庶幾昔賢已而意不自得病復
交攻不二年所竟自免歸削迹周行遠影空谷邇來竊
比古人優游卒歲之知樵牧自營與世隔絕者今二十
四年往歲華亭冠服之貺所以惠待僕者不終負矣但
溫繹舊學疑滯紛如無由就正有道獨抱憤懣耳風波
渺爾晤語無涯願崇令德永以為好

別遠懷企殊渴顧舟卿來辱冠履雲布之惠此野人初

服也知己遠惠重侔麗錦矣奔驚塵坐三物在笥三載
於茲林壑興懷愧汗屢浹去冬先妻不幸歸骨故丘茲
行及期而病留之乃始圖拜嘉賜溪山猿鶴共相欣戴
也希淵行便匆遽裁報未申千萬厚自愛以佇驛召

與彭山季明德太守

二首

都下邂逅遂沐知愛勉以古人向上之學君子與人為善
固不逆謂無似非其人耶繼辱墨教拳拳以心學相鐫
切殆真謂某可進於斯矣某從前積累既淺麤心客氣

卒未能自克外物紛至不免與之俱驅耳先正謂培擁根本然後可立趨向所以培根本立趨向實用功處便風弗吝一一不敢忘自力也

病耗巖栖百事漠然于懷惟道義交游時存夢想恭惟邃學堅志敏手通才所向無前深以閱歷更當何如僕迂懶頽惰瞠乎其若後矣兄將何以畀之德翊先生去便布此風波如許邂逅未涯千萬順時強食自愛

與磨溪熊以仁憲副

某曩殿班行執事特以年愛過私歸更憂患跼伏十年
猶耿耿夢想風采也伏承按節南省彌劇傾溯病不任
衣冠望燕已申積懷為罪顧辱手教臨存嘉果牢醴副
之登拜感忤浙河民性馴畏比歲小康兄才望德威自
足坐鎮願勿擾也

與橫山徐曰仁侍御

邂逅扳聯知愛隆篤侔于兄弟中間去住相失而英風
雅度膠於吾心猶一日也祈州政績偉然度越流輩上

追循良於此見曰仁素學有用同志者亦自增氣夏初
聞南都陟命畫錦歸寧年勞故常不以是為曰仁多惟
高堂壽祉令子岐嶷僕為喜而不寐耳暑毒殊酷惟為
國加飯自愛

與棟塘陳忠夫

伏惟晉陟方岳善人之澤殊為湖南數千里賀某多病
放廢壯心蕭然霜葉矣故人志義久要能不亟訝絕之
否

與勿齋婁存仁太守 二首

伏聞親舉玉趾以勤疲民復條捍海事宜下問某病伏
九年若與世隔寧有長計可備采擇耶今患固亦天數
譬之父母於子豈忍以其病在必死而不求所以生之
秋成近隄海波及田勢甚惶急當堰瀕海內河為先海
塘用石如海鹽固善特恐仁人不忍疲民任此勞費但
當深基密築一倣昔日故堤叅以近日治河之法更須
博擇三五精悍辦事僚吏闔郡不足檄訪他郡必務得

人如漢議河防又必分地程功實舉懲勸似或有濟況漸次講驗又必有經久良便之策出於其間以超始議者伏惟精誠動天寬博酌民顧此何足采擇瞻溯光儀無由趨炙曷任悚懼

某山澤淪廢懷企聲猷不能自達惟兄誼舊愛私時抱傾渴實倍恒情非敢為佞也某本戶稅糧往承惠念批從鄉宦自運例甚便甚厚但瀕海旱蝗已三浹歲民力竭矣某坐食如蠹又奪民便義何能安伏乞改批允運

與里父兄均勞獲釋罪媿蒙被君子之愛良雅瑣瑣伏
惟貸察

與筆峰王應時憲副

某惡鍾奇禍天不速之死而奪其所以生慈嚴相繼背
殞不孝未得相從地下累然苟存殘息於苦山間安復
知有人世事故人枉書讓其疎問罪戾餘生益用隕絕
不能卒讀矣周生以其父臣貴屬校官力請報書中及
之某識周生自兄書郵始遠道寒羶使有溫意何如諸

所欲言或未即死圖更布之荒迷不次

與白山倫彥式司成

春和伏惟台候百福某達遠德範幾二十年比嘗卒業南畿試錄序淵乎藹如也竊窺德業遠詣鄉往益勤執事方以此學教天下行以此學相天下其將挽澆浮而還敦慤其盛某積疾殷憂日夕鄰死殘形餘息偷延空谷中分無復僭望於世惟英賢入當台鼎隆世道幸斯民者日勤望之

欽定四庫全書

雲村集
卷五

十六

與潘薦叔憲副

某待盡空谷世緣如掃高賢志義獨膠於心時牽夢想阻越無由一布之只尺耳伏承信使多儀遠逮深谷感惕何堪僕病伏不關時論奉諭閔俗仰窺當世之慮夫俗漸以下勢也頃乃頓改競趨可駭厥或有開其先者執事日夕入秉樞筦諒當植本握機以拯之猶可障其潰決此真執事事也僕方將藉焉優游聊以卒歲矣

與梓溪舒國裳修撰

兄危言大計天下知之僕則以兄占世有隱憂焉不知涕之既隕也履變孔多閱理彌熟今來所造詣所謂將降大任焉者天意有在私望甚侈吳德翊先生去便勒手狀布區區宣公奏議奉為忠諫助風波如許邂逅未涯南望曷任淒斷

與海州廖師賢

冀都邂逅等萍水耳伏承抗章引疾獨心異之別去四易歲此懷耿耿常有師賢也近冬蔡希淵寄惠教函詩

欽定四庫全書

雲村集
卷五

十七

翰廼師賢於僕亦爾懇懇良極感歎伏詒嘉謬靜脩舊學諒加邃密僕病耗巖栖塊然蒲團睡漢爾吳德翊先生去便勒狀區區德翊善信君子僕之益友兄試契勘何如時不待人願益強飯力學自愛

與穎谷陳遂初 三首

章江事變甚駭私心劇于燔灼執事義均王臣諒同此懷宗社有靈非久當靖顧恐吾土歲饑民貧或有狗鼠輩乘時竊發奈何奈何幸為寄民社者力贊一畫固不

得避出位之嫌也艱虞之會惟國士為時益自愛

僕知海內有鄭少谷已十年餘寤寐恍然幾見風采來約
及少谷佳製并辱三復之餘神魂飄飄凌南北兩峯之巔
矣屬有寒疾方汗君能為我少挽行李敬執鞭弭以從
春和侍奉多福病夫怯風猶未春服也悵望風度徒切夢
想耳未間千萬自愛

吳汝瑩參政

恩舊違闊思即晤教恨不傳翼以風病縛如尸江城徒切

卷五
帳望奈何乃勤信使諄諄久要高誼感刻無量重以幣
物牢醴之縟悚惕殊不能堪惟兄賢勞中外某獲落淪
廢分終為溝中之瘠耳伏惟不遂遐棄便風時惠督之
俾不辱林壑以為兄羞至願雲塗迥爾瞻奉未涯千萬
為明時厚自愛

與儼山陸子淵司成 二首

某私淑餘論越自諸生時頃歲奔騖未能通謁遠枉誨
函無任慚感伏惟高居靜養台鼎策勲中外僉屬某病

廢跽伏拭目以俟唐君便扶憊裁報貸察不宣

某稔惡及親圖嚴其終而信其善於永永以少寬不孝之譴惟名言是賴日蒙惠諾曷惟不孝沒世感泣而子若孫將永憑藉以光寵於無窮矣襄事期迫不得違次以領伏惟矜而畀之

與虞山陳原習中丞

某病廢空谷分不齒於周行乃屢執事餘論疊疊惠問繼之得非或有妄譽某以欺執事者風裁之地微寓捐

金駿骨之意耶伏承總憲三河某病力不任道周羈縻
之役第日洗耳巖栖伏聽詔追老成亟登政府以福天
下冒昧悚仄

與汪德聲廉憲

溽暑台候多福伏承總憲大藩風裁凜如而敦雅溫博
寓於其中甚盛某不天烈禍積疴為世不祥人屏淪荒
谷眇接親知十四三年矣大人君子之光儀徒切向往
安敢輒以漫刺溷閭吏伏辱教函書錦之及俛屈崇巖

先於萎廢殆執事者微示延攬不已之盛心風動南土
耶

與應原忠太史

闊達道範積有歲年伏惟齒德彌崇屹樹斯道之幹尤
日瞻企承再道杭輒遺俯問殊感勤愛某多病殷憂學
殖情曠仰負獎援多矣自分迂慙應俗多忤日惟屏迹
保身課孫延祀優游卒歲為期耳執事不終遺外仰祈
教督至望風便謹勒手狀布區區未間千萬為道崇護

與東圩錢公良太守

谿翁來諭尊候嘉適甚慰承屬老夫人幽宮之文伏惟
愛舊義豈敢辭南溪東濱西臯下委皆嘗副命執事惠
顧尤厚僕豈懵然第齒增十年精耗大半病復侵尋知
舊報書經旬滯閣如斯紀述量力經歲猶不能就緒也
學殖蕪廢又未暇支離自解耳

與任

闕

廉憲

枉襲崇嚴惠存萎廢下士曠舉薄古厲今矣顧某闇劣

無所敢當慚懼千萬登領朋尊酣咏巖扉以醉嘉賜果
牢敢辭野人之固伏惟惠寬其誅

與蕭子維御史

達遠顏辭無任瞻企恭惟執事遵晦養望茂膺多福方
今渴賢之日執事志存當世宜重為當世慮恐不得如
僕賤劣者之偷便其私也風便列狀布區區千萬為國
加愛

與南溪張鵠舉大尹 二首

某舊齒過從頃歲守冢移家受廛封內姓名凶穢尚稽
內謁顧辱騶從儼然先之繼承信使多儀之及感忤何
可當附狀敬致謝私病力未能走煩閤人伏惟貸察不
次

頃聞陟郡殊為邑人惜復為湖人賀執事雅望方當入
贊臺省出典方嶽尚爾迴翔師帥之地固造命者欲使
老練民事以為受大任重之基耶卧病不能往助攀轅
奉晤未涯千萬為國加愛

與平齋沈一之 二首

冬寒體力健勝僕時時隨病支吾耳使惠遠將良荷勤
督勸之應詔臣子大戒義當委躬竊伏自量病力迂才
出將有負無補死等溝壑徒辱知己計必苟完此身下
見先人為得張靜峰寶婺貽書亦是此意甚感其善處
僕也但貧家歉歲欲上疏未能遣發奈何兄家務殷重
似宜輟一曉事郎君代勞蓋學者必須靜專方見得力
况衰年強為浮世所役却與僕昧幾強出者相去恐非

尋丈之懸也

使至不得手諭兄豈忘僕耶適偶倦耶僕多病且喪幼
孫老懷惡甚舊疾殊劇時時以不可奈何自寬耳兄傳
家謝事甚適但僕僭議在數年前今特差晚也教子儉
退固善似須先革其富貴氣習則儉退自若固然矣否
恐或不免終扞格也僕空山日與耕樵伍歉歲日甘藜
苒食甚習兄或命舟一來共此風味乎

與西村朱元素

二首

某獨學迂誕與公等儀觀未相覲觴酒豆殽未嘗接殷
勤勸氣勢無所倚依某之屈伸榮辱安足與公等戚欣
而動其心耶頃歲抱藝弗售宜黜宜陟之在某與不公
不明之在有司與否未白也非直交親者之無介然於
其懷而某且以斯文之興喪有命自寬焉公等顧忿然
不直有司形於咏什慰諭勞苦若平生歡殆不虞浮實
之聲過聽於素而有司一時陵厲頓挫之已甚者驟激
其哀憤耶憐才悼屈公等無所為某則不敢忘也日偕

計吏再比禮闈野性彌自安恬更不假命以自寬矣公
等無重為我戚戚也養高巖穴咏歌太平實惟其時公
等慎自愛

過可材訊公眠食多適良慰山人病力事百不堪一切
世緣久絕夢想獨未能忘情山水間耳公能時來溫舊
約不

與孟涓郭一丈

觸暑臨存已拜勤注侑以儀物沃以清談經歲黃埃倥

惚中人灑然毛骨俱爽孤帆西引神飄飄與畫鷁偕逝
矣

與勾溪陳用明

曠接笑言欲見殊渴率爾鼓柁溯秦谿冀良覲晏溫被
葛登舟薄午北風頓厲便蕭然有山廬挾纊之想縱帆
飽風而南矣造物限人非剡客例公也

與胡靜菴少宰

三首

比辱大旆左臨甚寵前騶過發弗得久侍誨論極悵惋

冬寒伏惟尊候萬福時方急賢執事志存當世而身繫其安危春和已近庶幾勉從簡書以慰天下之望

昔拜枉教茲荷惠存與進盛意何以仰承日惟自策疎劣期不辱高義以為報耳當軸簡命中外倚望已久曷惟某得快瞻侍傾否之會方須舊德望實如執事恐義不容以私為解也聞教有期彌切向往

伏承誨函三復卒業竊窺仁人憂天下之心甚大且遠亟欲身承指畫只尺郡城多病限阻徒切神往伏惟執

爭俯制禪吉將正台司以福天下某哀病未能策孱軀
貝羈縲以從猶當拭目為天下蒼生日望之

與董子濤丈

叩病苦塊忽承厚奠高文之辱蹶起感泣為先君稽顙
一鄰初約孤雖不肖公或屑就尚勉飲承曷敢越先志

與樂有祝思允太守 三首

馳馳勞瘁不得過從慰苦悵望何如枉問喪禮夫俗安
人習驟欲反古多口固宜但吾所守或過於中所執或

非其大似當避夫矯俗干譽之嫌以近人情若其大者知之真操之力生死不易而況於浮言哉於此惴惴或恐見不定內不足耳要當勉求諸已可也大戚中有此
逖役伏枕徒爾神往

什來墨諭陳義甚高似於知我未盡故再布區區僕行
惻諧俗比得吾弟意氣相知輒爾受惠自附於孺子為
李偉飲食之義今之人沾沾自好矯竊古人之似者有
之矣實何有哉而弟槩以僕為徇世且鄙其學魯獨居

之男子似太隆末俗蔑古人而淺我也夫僕昔匱而受
今足而歸我弟知其不足而予於其足而取是之謂直
是之謂義必欲辭之以為高是不免以僕身為溝壑其
為愛我耶原封繳納願益力古道追古人翼蹇鈍以達
於高明則相知出於尋常受愛更不可涯矣

令弟來言買山事聞之茫然豈傳言者誤兩曾參耶不
爾知我太淺矣唐人詩曰無心與物競鷹隼莫相猜為
兄誦之

與萬鹿園都督 二首

某病廢空谷十年餘不知有人間事矣獨於吾兄遠心
勝韻時時悵爾神往伏聞大故抗制用情良為道義增
氣慙伏弗遂把手慰苦為恨疆事孔亟世祿之英想亟
搯腕諭及出世之旨見解益玄起而作用當與時流自
別風波未涯千萬為時強飯加愛

僕屏跡巖栖二十許年疎懶自外於達黨以公之超俗
逸羣素所向往不能尺牘自達其區區曷任內愧伏惟

玄探妙解試之功業作用必大有得力處非稿寂所能
窺矣

與僧石門秀公

四首

敬問石門山人無恙走養拙山中眠食粗遣頃為國事
抱漆室之憂山人慈悲當亦為衆生煩惱耶遲一雨後
載月徑造東林也

今日訪公五畝山房公卧雨北窗曾栩栩得信息否分
付白足亟下一榻於東林深處

病謝過從齋居如僧一切事都不關念獨泉石舊遊時
栩栩入夢耳清香近作聊致我私山房守歲談詩一藝
而詠之若與病夫相對也

某問石門山人無恙頃得哭太白山人近製知山人果
爾蛻去傷哉傷哉追念舊遊夢乎非耶渠忘情去來者
猶有鬼神得無笑我與公尚爾鍾情耶

王通守

某憂病沈淪多歷年所飫聞執事抱經世之猷布宜民

之政十里屬心周行馳譽甚盛病骨不任衣冠阻望屏
寫僅嘗一修咫尺為邑父兄謝恤災之惠耳某自慚行
義未崇鮮孚於俗而來誣罔敢謁執事者白之白之非
硜硜自好而亟自明也為士風計為民習計爾士風民
習抑又執事師帥一郡者之責某安得詭徼長者之譽
但已而不一陳於執事耶縣市民楊坡者某素不識其
人作何狀不知何由挂賤姓名於訟牒牒中諸人與事
某一不曉其誰何自不必論但某嘉靖癸未乞恩歸遭

多難入山杜門如蟄十有四年一日也曷惟滅跡城市
蓋已却保社於鄰曲絕慶弔於親黨此邦人士以及四
遠有識所共明知不寧是耳某自弱冠為學官諸生公
會庭叅之外絕未嘗持一謁候縣門邑中吏民之所睹
記可徵也今一妄男子無端以偏辭冒加之而莫之究
則邑人將皆曰許某守身如斯蒙垢如斯斯時白黑混
混無良之民日罔忌憚且復何以勸士吾恐貞廉之風
自此日益不競而黜桀無賴之姦鱗集蠹擁巧詆厚誣

彌尚彌工四百里間刀筆利於戈鋌以蠚善類而海寧
猝難政教理矣其漸將不自某今日之太白而加熾乎
愚為此懼伏聞祭戟行部追呼聽理以竟此詞為便輒
一牘少布腹心萬惟執事留神窮治之審其與某毫毛
何所關涉務見根柢片言立折之不但某獲雪垢汙且
使士勸民懲而成善俗矣

與顧近泉秀才

某學負先訓老無聞知慙不但已強令兒子從事舊業

少儋積志訪求矩正伏飫德音大業茲敢卜日戒舟奉
迓行李儼然臨辱抗顏作模寧惟小子詠游教澤稿廢
亦將與霑餘潤矣

雲村集卷五